



REPUBLIKA E SHQIPËRISË
AVOKATI I POPULLIT
Seksioni i Veçantë



Adresa: Bulevardi: "Zhan D'Ark" Nr.2
Tiranë, Shqipëri

Tel/Fax: +355 4 2380 300/315
E-mail: ap@avokatipopullit.gov.al
www.avokatipopullit.gov.al

Nr. Prot.
Nr. Dok. 201600429/2

Tiranë ___/___/2016

Lënda: Rekomandohet *"Marrja e masave të menjëhershme për ekzaminim dhe trajtimin mjekësor të dënuarve Sh. Zh., dhe A. M., të cilët janë duke vuajtur dënimin në IEVP Peqin"*.

Drejtuar : Drejtorit të Institucionit të Ekzekutimit të Vendimeve Penale
Z. Emiljano ZEFI

PEQIN

Për dijëni: Drejtorit të Përgjithshëm të Burgjeve
Z. Artur ZOTO

TIRANË

I nderuar Z.ZEFI,

Gjatë inspektimit të punonjësve të Mekanizmit Kundër Torturës pranë Institucionit të Avokatit të Popullit më datë 26.02.2016, kanë paraqitur ankesë shtetasit e dënuar Sh. Zh., dhe A. M., persona me probleme në shëndetin e tyre.

Kështu, i dënuari Sh. Zh., ka ngritur shqetësimin se ka paraqitur disa herë kërkesa për kryerjen e një ekzaminimi mjekësor të specializuar, ndërsa i dënuari tjetër A. M., për marrjen e disa medikamenteve mjekësore ekuivaklente që ndodhen në listën e barnave të rimbursueshem pasi nuk ka mundësi financiare për blerjen e tyre, dhe megjithatë kërkesat e tyre nuk janë marrë në konsideratë.

Në nenin 5 të ligjit nr.8328 datë 16.04.1998 “Për të Drejtat dhe Trajtimin e të Dënuarve dhe të Paraburgosurve” i ndryshuar, i cili bën fjalë për Parimet Themelore, thuhet: *“Të paraburgosurit dhe të dënuarit trajtohen me dinjitet dhe duke respektuar të drejtat njerëzore të tyre”.*

Kurse në nenin 33 të ligjit të mësipërm, i ndryshuar me ligjin nr.40/2014 datë 17.04.2014 i cili bën fjalë për Shërbimin Mjekësor, thuhet: *Shërbimi mjekësor sigurohet gjatë gjithë kohës së qëndrimit në institucion nga Drejtoria e Përgjithshme e Burgjeve dhe mbulohet nga sigurimi i detyrueshëm i kujdesit shëndetësor, sipas skemës në fuqi. Personat e paraburgosur dhe të dënuarit me burgim përfshihen në kategoria të personave ekonomikisht joaktivë, në kuptim të ligjit në fuqi, dhe përfitojnë, pa pagesë, të gjitha shërbimet që ofron skema e sigurimit shëndetësor sipas këtij ligji”.*

Të drejtat e të dënuarve për trajtim në shërbimin shëndetësor parashikohen dhe në aktet ndërkombëtare. Kështu, në Rekomandimet e Komitetit të Ministrave të Jashtëm të Këshillit të Europës datë 12 Shkurt 1987 “Për Rregullat Europiane të Burgut”, ku në kapitullin që bën fjalë për Drejtimin e Sistemit të Burgjeve, në pikën 29 thuhet: *“Mjeku do të vizitojë dhe ekzaminojë secilin të burgosur menjëherë pas pranimit dhe më vonë sa herë të jetë e nevojshme, në mënyrë të veçantë për të zbuluar sëmundje fizike ose mendore dhe për të marrë të gjitha masat e nevojshme për trajtim mjekësor...”* kurse në Pikën 30.1 thuhet: *“Mjeku do të kujdeset për shëndetin fizik dhe mendor të burgosurve dhe në përputhje me kushtet e intervalet e standarteve spitalore, do të vizitojë të gjithë të burgosurit e sëmurë, të gjithë ata që raportojnë për sëmundje, ose dëmtim dhe çdo të burgosuri t'i kushtohet një vëmendje e veçantë”.*

Në Pikën 32 të Rekomandimeve të mësipërme thuhet: *“Shërbimet mjekësore të institucionit do të kërkojnë që të diagnostikojnë e kurojnë çdo sëmundje ose të metë fizike e mendore, që mund të pengojë riintegrimin e një të burgosuri pas lirimit. Për këtë qëllim, të burgosurit do t'i sigurohen të gjitha shërbimet e nevojshme mjekësore, kirurgjikale dhe psihiatrike, përfshirë ato që janë në dispozicion të komunitetit”.*

Shqetësimi i të dënuarit Sh. Zh., për të kryer një ekzaminim të specializuar për sëmundjen që ai paraqet, duhet të realizohet nga Shërbimi Shëndetësor i atij institucioni. Sa i përket rastit të ankesës së të dënuarit A. M., të krijohet mundësia që medikamentet e përdorura prej tij “Seroksot” dhe “Zameks”, të zëvendësohen me medikamente ekuivalente të cilat përfshihen në listen e barnave të rimbursueshme, rrjedhojë e pamundësisë së tij financiare.

Nga ana tjetër do të sugjerohet që nga ana e personelit mjekësor të Shërbimit Shëndetësor në I EVP Peqin, të verifikohen e identifikohen dhe raste të tjera të mundshme, të kërkesave të dënuarve që paraqiten me probleme të ndryshme të shëndetit.

Për sa sipër duke gjetur se ankesat e shtetasve të dënuar Sh. Zh., dhe A. M., janë të drejta, bazuar në nenin 63, pika 3 të Kushtetutës së Republikës të Shqipërisë ku thuhet: *“Avokati i Popullit ka të drejtë të bëjë rekomandime dhe të propozojë masa kur vëren shkelje të drejtave të njeriut nga administrata publike”* dhe në bazë të nenit 21 gërma “b” të ligjit nr.8454 datë 04.02.1999, “Për Avokatin e Popullit” me ndryshimet përkatëse ku thuhet: *“Avokati i Popullit pas përfundimit të hetimit, paraqet rekomandime për vënien në vënd të së*

drejtës së shkelur tek organi administrativ, që sipas tij, ka shkaktuar shkelje të të drejtave dhe lirive”,

REKOMANDOHET

“Marrja e masave të menjëhershme për ekzaminim dhe trajtim mjekësor të dënuarve Sh. Zh., dhe A. M., të cilët janë duke vuajtur dënimin në IEVP Peqin”.

Për qëndrimin që do të mbani dhe masat që do të merrni në zbatim të këtij Rekomandimi, lutemi na njoftoni brënda afatit ligjor prej 30 ditë, e parashikuar në nenin 22 të ligjit “Për Avokatin e Popullit”.

Duke besuar në mirëkuptimin tuaj.

Konc.&Dakt.P.A.
Tiranë më 23.03.2016

KOMISIONERI

Arben SHKËMBI